

NOGOMETNI SAVEZ FEDERACIJE BiH

PROPOZICIJE

takmičenja/natjecanja Prve futsal lige FBiH grupa "Jug" i "Sjever"
za takmičarsku/natjecateljsku 2016/2017 godinu

Sarajevo: listopad/oktobar 2016. godine

Broj: 929-I/16
Sarajevo: 17.10.2016.

Na osnovu člana 32. Statuta NS Federacije BiH, Izvršni Odbor Nogometnog saveza Federacije BiH, na osnovu člana 32. Statuta Nogometnog saveza Federacije BiH i člana 4. Pravilnika o nogometnim takmičenjima NS/FS BiH, na sjednici održanoj 17.10.2016. godine u Sarajevu, donosi s l j e d e ć e:

PROPOZICIJE
takmičenja/natjecanja Prve futsal lige FBiH
za takmičarsku/natjecateljsku sezonu 2016/2017

OPĆE ODREDBE

Član 1.

Ovim Propozicijama utvrđuje se način rukovođenja i organizovanja Prve futsal lige Federacije BiH u takmičarskoj 2016/2017 godini. Takmičenjem/natjecanjem Prve futsal lige FBiH rukovodi Izvršni odbor NS FBiH preko imenovanih takmičarskih/natjecateljskih organa.

Član 2.

U futsal takmičenju Federacije BiH u takmičarskoj 2016/2017 godini učestvuje 10 klubova, koji su raspoređeni u dvije grupe prema regionalnoj podjeljenosti i to: grupa “**Jug**” i grupa “**Sjever**”.

Prvu futsal ligu FBiH grupa “Jug” sačinjavaju:

- MNK “Calp” Zenica
- MNK “Diabih” Sarajevo
- MNK “Kreševo”
- FC “Velež Mostar SG” Mostar
- MNK “Željezničar” Sarajevo

Prvu futsal ligu FBiH grupa “Sjever” sačinjavaju:

- MNK “Banovići”
- MNK “Buba Mara” Cazin
- MNK “Bosna Kompred” Tuzla
- MNK “Klanac” Brčko
- MNK “Vega Mix” Živinice

UKOVOĐENJE TAKMIČENJEM/NATJECANJEM

Član 3.

Takmičenjem/natjecanjem rukovodi Izvršni organ NS FBiH putem imenovanih takmičarskih/natjecateljskih organa.

Izvršni odbor NS FBiH donosi kalendar takmičenja/natjecanja i utvrđuje način žrijebanja klubova.

Izvršni odbor za NS FBiH imenuje sljedeće organe takmičenja/natjecanja:

- Komesara/povjerenika za takmičenje/natjecanje koji registruje utakmice, donosi prvostepene odluke, rješava žalbe u prvom stepenu, rješava sva pitanja iz takmičarskog dijela, određuje delegate za utakmice, vrši analizu obavljanja delegatske dužnosti,
 - Komisija za suđenje delegira sudije i vrši analizu suđenja na svim utakmicama.
- Disciplinska komisija NS FBiH donosi prvostepene disciplinske odluke.

Apelaciona Komisija NS FBiH je drugostepeni organ koji donosi odluke po žalbama na prvostepene odluke iz takmičarskog i disciplinskog dijela.

Član 4.

Takmičenje/natjecanje Prve futsal lige Federacije BiH grupa „Jug“ i „Sjever“ provodi se po dvostrukom bod sistemu i vremenski utvrđenom kalendaru, sa dvije takmičarske/natjecateljske polusezone, jesen i proljeće.

Kalendar i raspored takmičenja, na prijedlog Komesara za takmičenje/natjecanje, usvaja Izvršni odbor NS Federacije BiH.

Raspored utakmica za prvenstvo Prve futsal lige FBiH „Jug“ i „Sjever“ određuje se žrijebom takmičarskih/natjecateljskih brojeva i primjenom „Bergerove tablice“.

U interesu što regularnijeg odvijanja završnog dijela takmičenja/natjecanja, utakmice posljednjeg kola igraju se istog dana, u isto vrijeme, prema utvrđenom rasporedu takmičenja/natjecanja.

Član 5.

Takmičenje/natjecanje Prve futsal lige FBiH „Jug“ i „Sjever“ administrativno se vodi kroz COMET informacioni sistem.

U dvoranama klubova Prve futsal lige FBiH treba biti posebna prostorija za sastavljanje zapisnika. Klub domaćin obavezan je da obezbijedi:

-ispravan kompjuter sa štampačem i ispravnom internet konekcijom za potrebe COMET informacionog sistema.

ORGANIZACIJA UTAKMICE – dužnost klubova

Član 6.

Nakon utvrđenog rasporeda takmičenja/natjecanja, klubovi su obavezni u roku od pet (5) dana da dostave u Sekretarijat za takmičenje/natjecanje:

-naziv dvorane na kome će igrati utakmice;

-mjesto odigravanja utakmica;

-boju dresova (dres, šorts i štucne), kao i rezervnu boju sa kojom će klub nastupati;

-dan odigravanja utakmica (subota ili nedjelja).

Član 7.

Klub domaćin igra utakmice u mjestu sjedišta kluba, a u nedostatku dvorane u zamjenskoj dvorani koja je dobila suglasnost nadležnog organa, a koja ne može biti van kantona/županije u kome je sjedište kluba, izuzev ako se radi o dvorani koja se nalazi na području drugog kantona/županije, a nije udaljen više od 50 km od mjesta sjedišta kluba.

Dvorana koju klub prijavi pred početak takmičarske/natjecateljske sezone ne može mijenjati tokom sezone, izuzev u iznimnim situacijama o kojima odlučuje takmičarski/natjecateljski organ uz poštivanje principa regularnosti takmičenja/natjecanja.

Član 8.

Organizaciju utakmica vrše klubovi domaćini, koji su obavezni obezbijediti sve uslove u skladu sa važećim propisima. Klub domaćin je obavezan poduzeti sve potrebne mjere za sigurnost sudaca, delegata i gostujućeg tima, za vrijeme odigravanja utakmice i sve do napuštanja dvorane.

Klub domaćin isključivo je nadležan za red i sigurnost prije, tijekom i nakon utakmice, te će biti pozvan na odgovornost zbog bilo kojeg incidenta, pa može biti kažnjen u skladu sa odredbama Disciplinskog pravilnika NS/FS BiH. U slučaju nastanka štete, klub domaćin dužan je nadoknaditi štetu nastalu incidentom.

Klub domaćin obavezan je na jarbole postaviti Državnu zastavu BiH i zastavu NS/FS BiH. Na jarbolima mogu biti entitetske zastave, zastave kantona/županija, klupske zastave i zastave fair-playa. Postavljanje drugih zastava nije dozvoljeno. Istaknute zastave moraju biti istih dimenzija.

Klub domaćin je obavezan na svim prvenstvenim i kup utakmicama osigurati liječničku službu i medicinskog radnika sa odgovarajućom medicinskom opremom, te imati prijavljeno adekvatno vozilo sa dežurnim vozačem u slučaju potrebe prijevoza do zdravstvene ustanove. Klub domaćin

dužan je da osigura za cijelo vrijeme trajanja utakmica prisustvo dežurnog licenciranog ljekara ili fizioterapeuta sa odgovarajućom medicinskom opremom.

Klub domaćin obavezan je utakmicu prijaviti nadležnoj policijskoj upravi i osigurati prisustvo pripadnika Policijske uprave sve dok se utakmica igra, te dok gostujući klub i službena lica utakmice bezbjedno ne napuste grad. Klub domaćin obavezan je osobu koja se stara o sigurnosnom aspektu prije, za vrijeme i nakon utakmice, te organizovati redarsku službu.

Klub domaćin obavezan je postupiti u skladu s odredbama ovog članka jer se u protivnom utakmica neće odigrati, a isti će snositi sve posljedice neodigravanja utakmice.

Klub domaćin obavezan je obezbijediti mjerioca vremena i najmanje jednu osobu za čišćenje terena, koji se moraju javiti delegatu i sudijama utakmice najmanje 30 minuta prije početka utakmice.

Za odigravanje utakmica Prve futsal lige FBiH „Jug“ i „Sjever“ klub domaćin je obavezan obezbijediti tri (3) ispravne lopte za futsal u skladu sa pravilom 2. Pravila futsal igre.

Član 9.

Utakmice se mogu zakazati u terminu (početak utakmice) od 13:00 do 20:00 sati i to ukoliko se igra u subotu ili nedjelju. Ukoliko se iznimno igra nekim drugim danom u sedmici, utakmica se može zakazati u terminu (početak utakmice) od 17:00 do 20:00 sati.

Klub domaćin obavezan je u NS FBiH, kao i protivničkom klubu, u pismenoj formi, dostaviti tačnu satnicu početka utakmice i to najkasnije četiri dana (srijeda do 12 sati) prije određenog dana za odigravanje utakmice.

Klubu koji ne postupi po prethodnom stavu, automatski se odlukom Disciplinske komisije izriče novčana kazna od 100 KM.

Član 10.

Klubovi su obavezni odigrati svaku utakmicu predviđenu rasporedom i kalendarom takmičenja/natjecanja

Klub koji ne doputuje na utakmicu ili ne obezbijedi dvoranu za utakmicu, pored takmičarskih posljedica (registracija utakmice službenim rezultatom), prema odredbama Disciplinskog pravilnika NS/FS BiH će se kazniti:

- oduzimanjem od tri do dvanaest bodova.
- novčanom kaznom od 500 KM do 2000 KM, koju je klub dužan platiti na račun NS FBiH u roku od osam dana od dana primitka odluke.

Član 11.

Svaki nedolazak na utakmicu smatra se neopravdanim, izuzev slučaja više sile što u svakom konkretnom slučaju cijeni komesar/povjerenik za takmičenje.

Klub koji započinje takmičenje/natjecanje u Ligi malog nogometa FBiH obavezan je da registruje dovoljan broj igrača, kao i da se stara o blagovremenom dolasku na utakmicu vodeći računa o eventualnim smetnjama na putovanju (kvar na vozilu, zastoje i drugo).

Gostujući tim obavezan je u dvorani gdje se igra utakmica biti 60 minuta prije zakazanog početka utakmice, a sastav tima sa igračkim legitimacijama dostaviti delegatu 45 minuta prije početka utakmice.

U slučaju neodigravanja dvije prvenstvene utakmice, prema odredbama Pravilnika o nogometnim takmičenjima/natjecanjima BiH, klub će biti isključen iz takmičenja/natjecanja i snosiće disciplinske posljedice.

Član 12.

U dvorani moraju postojati svlačionice za obje ekipe i posebna svlačionica za suce. Sve svlačionice trebaju imati mokre čvorove - kupatila sa toplom vodom, za igrače sa tri (3) tuš ruže, a kod sudaca jedna (1) tuš ruža. Svaka svlačionica (sudijska posebno) treba imati zaseban WC.

Član 13.

Klub domaćin obavezan je kvalitetno snimiti kasetu utakmice Prve futsal lige FBiH „Jug“ i „Sjever“ na DVD-u i neposredno po završetku utakmice DVD u zapečaćenoj koverti, ovjerenom klupskim pečatom, predati delegatu utakmice. Obavezno je snimanje i poslije utakmice, sve dok igrači i službene osobe ne napuste parket i to pod prijetnjom disciplinskih sankcija.

Klub domaćin je obavezan omogućiti snimanje svake prvenstvene utakmice gostujućem klubu. Ukoliko klub domaćin pravi smetnje klubu-gostu prilikom snimanja, delegat će odmah obavjestiti komesara/povjerenika takmičenja/natjecanja. Gostujući klub ima pravo snimati utakmicu u dvorani drugog kluba, ali nema pravo istu emitirati na bilo kojoj TV stanici bez odobrenja kluba domaćina. U slučaju nepridržavanja naprijed navedenih odredbi klub će snositi takmičarske i disciplinske posljedice.

Klub koji je prema ovim Propozicijama bio obavezan, a ne snimi utakmicu, ili koji ne dozvoli gostujućem klubu snimanje utakmice, klub koji u propisanom roku nadležnom organu ne dostavi video-materijal sa utakmice ili ga dostavi u neispravnom ili neupotrebljivom stanju, bit će kažnjen:

- novčanom kaznom od 500 KM do 1.000 KM,
- a u težem ili ponovljenom slučaju od 1.000 KM do 2.000 KM.

LJEKARSKI PREGLED IGRAČA:

Član 14.

Svaki igrač mora imati sportsku iskaznicu sa ubilježnim datumom i ovjerenim ljekarskim pregledom (pečat) od strane Zdravstvene ustanove koja je određena za pregled sportista. Izuzetno, može imati zvaničnu ljekarsku potvrdu (sa tačnim datumom i pečatom ljekara i ustanove) o izvršenom ljekarskom pregledu u navedenoj zdravstvenoj ustanovi, što se može primijeniti izuzetno i samo za jednu utakmicu nakon čega pregled mora biti upisan u legitimaciju.

Ljekarski pregled važi 6 (šest) mjeseci, a za igrače mlađe od 17 godina 4 (četiri) mjeseca.

Igrač koji nije upisan u zapisnik utakmice, ili koji nije izvršio ljekarski pregled, ne može nastupati na prvenstvenim utakmicama.

Protiv kluba i igrača koji prekrši odredbe ovog člana bit će pokrenut disciplinski postupak prema odredbama Disciplinskog pravilnika N/FS BiH.

PROMJENA TERMINA , ODLAGANJE UTAKMICE

Član 15.

Promjena termina odigravanja utakmice može se vršiti na osnovu podnesenog pismenog zahtjeva zainteresiranog kluba, koji mora biti podnesen povjereniku za takmičenje/natjecanje, najkasnije osam (8) dana prije utvrđenog termina odigravanja utakmice, a koji u sebi sadrži razlog zbog kojeg se traži promjena termina utakmice s priloženom dokumentacijom iz koje se može utvrditi opravdanost podnesenog zahtjeva sa eventualnim prijedlogom za novi termin odigravanja utakmice.

U slučaju kada zahtjev za promjenu termina nije podnesen u skladu sa prethodnim stavom, povjerenik za takmičenje/natjecanje može promijeniti termin utakmice samo ukoliko je klub koji traži promjenu termina dostavio i pismenu saglasnost drugog kluba, što je moguće najkasnije tri (3) dana prije utvrđenog termina utakmice.

Odluku o izmjeni dana odigravanja utakmice uvijek donosi komesar/povjerenik za takmičenje/natjecanje nakon sagledavanja svih okolnosti koje mogu imati uticaja na regularnost takmičenja/natjecanja. Utvrđena satnica početka utakmice koju je klub najavio najkasnije četiri dana prije dana odigravanja utakmice, može se u opravdanim slučajevima promijeniti odlukom komesara/povjerenika za takmičenje/natjecanje.

Komesar/povjerenik takmičenja/natjecanja može u opravdanim slučajevima, odobriti izmjenu dana odigravanja pojedinih utakmica na taj način, da se iste odigraju prije rasporedom utvrđenog termina, odnosno najkasnije prije odigravanja utakmica sljedećeg kola.

Član 16.

Utakmica se može odgoditi ukoliko je iz jednog tima pozvano dva ili više igrača u reprezentaciju Bosne i Hercegovine radi odigravanja utakmica predviđenih kalendarom takmičenja.

Odluku o odlaganju utakmice donosi nadležni takmičarski organ i o tome pismeno obavještava zainteresirane klubove.

PRAVO NASTUPA

Član 17.

Na utakmicama imaju pravo nastupa svi pravilno registrirani igrači koji su navršili 17 godina života i koji su stekli pravo nastupa na prvenstvenim utakmicama. Izuzetno na prvenstvenim utakmicama mogu nastupiti i igrači koji su navršili 16 godina života sa specijalističkim liječničkim pregledom, ovjerenim od matičnog saveza. Pravo nastupa utvrđuje delegat utakmice, prije početka, uz nazočnost predstavnika klubova.

Na utakmicama Prve futsal lige FBiH „Jug“ i „Sjever“ mogu nastupiti samo igrači koji su operativni u COMET informacionom sistemu (koji su prošli proces registracije).

Klub može započeti utakmicu samo ako ima osam (8) sposobnih igrača u sportskoj opremi, koji se upisuju u zapisnik.

U sastavu prijavljenog tima Prve futsal lige moraju se nalaziti najmanje dva (2) igrača mlađa od 21 godine života, koji moraju biti fizički prisutna na klupi za rezervne igrače u sportskoj opremi i upisani u zapisnik sa utakmice.

Za takmičarsku 2016/2017 godinu, kao igrači mlađi od 21 godine života smatraju se igrači rođeni 01.01.1995. godine i mlađi.

U slučaju nedostatka mlađih igrača do 21 godine, suprotno navedenom stavu ovog člana, utakmica će biti registrovana službenim rezultatom 3:0 (par forfe) za protivnika u korist protivnika u skladu sa članom 76. stav 3. Pravilnika o nogometnim natjecanjima, a klub će snositi i disciplinsku odgovornost.

Na prvenstvenim utakmicama nemaju pravo nastupa igrači koji se nalaze pod suspenzijom, kaznom zabrane igranja i automatskom kaznom zbog tri opomene.

Automatsku kaznu zabrane igranja jedne prvenstvene utakmice nastalu zbog dobivene tri opomene, igrač izdržava na prvoj sljedećoj prvenstvenoj utakmici.

Na svim prvenstvenim utakmicama može biti prijavljeno do devet (9) zamjenskih igrača. Igrač registriran za veliki nogomet može u jednom danu nastupiti na dvije utakmice i to isključivo na jednoj utakmici futsala i jednoj utakmici velikog nogometa.

Član 18.

Na utakmicama Prve futsal lige FBiH mogu nastupati samo oni igrači koji su proglašeni zdravstveno sposobnim, što mora biti upisano u sportsku iskaznicu.

Na prvenstvenim utakmicama mogu nastupiti samo igrači čiji je identitet utvrđen putem sportske legitimacije izdate od nadležnog organa za registraciju, a u slučaju njenog nedostatka identitet će se utvrditi na osnovu javne isprave: lične karte ili pasoša uz predočenje potvrde o izvršenom liječničkom pregledu.

Ukoliko se identitet igrača utvrđuje na osnovu javne isprave, klub je obavezan na zahtjev komesara/povjerenika za takmičenje dostaviti u NS FBiH sportsku legitimaciju u roku od 24 sata. Delegat će navesti broj osobne iskaznice ili putovnice, a u izvještaj i sve ostale relevantne podatke (matični broj, datum rođenja i dr.).

Izuzetno igrač u nedostatku sportske iskaznice, osobne iskaznice (lične karte) ili putovnice/pasoša može nastupiti na utakmici, s tim da je dužan najkasnije 15 minuta po završetku utakmice predočiti valjani dokument zbog osobne identifikacije.

Identitet se u pravilu utvrđuje prije početka utakmice.

Za igrače koji su zakasnili na početak utakmice, odnosno na početak drugog dijela, a upisani su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.

Član 19.

U takmičenju Prve futsal lige FBiH dopušten je nastup **tri (3)** igrača strana državljanina na utakmici. Igračima stranim državljanima ne smatraju se igrači koji imaju dvojno državljanstvo od kojih je jedno Bosne i Hercegovine.

U slučaju većeg broja stranih igrača, suprotno navedenom stavu ovog člana, utakmica će biti registrovana službenim rezultatom 3:0 (par forfe) za protivnika u korist protivnika u skladu sa

članom 76. stav 3. Pravilnika o nogometnim natjecanjima, a klub će snositi i disciplinsku odgovornost.

OPREMA IGRAČA:

Član 20.

Klubovi moraju poštivati boju sportske opreme kluba protivnika, koje su prije početka prvenstva prijavljeni u Sekretarijat saveza i objavljena u biltenu NS FBiH.

Timovi na jednoj utakmici ne mogu igrati u istim ili sličnim bojama sportske opreme. U slučaju da se podudara boja opreme kod dva tima dresove će promijeniti domaća (prvoimenovana) ekipa, a delegat utakmice je obavezan prijaviti tim zanemarivanja boje sportske opreme a klub će snositi disciplinsku odgovornost.

Brojevi na dresovima moraju odgovarati onima na popisu igrača u zapisniku o utakmici. Ako su dresovi prugasti ili šareni, brojevi moraju biti na jednobojnoj podlozi. Za vrijeme odigravanja utakmice igrači na poleđini dresova moraju imati vidljive brojeve propisane veličine.

Obavezna oprema igrača je:

- dres
- šorts
- štucne
- kostobrani
- odgovarajuće patike

Također, igrači koji se nalaze u tehničkom prostoru obavezni su nositi markere sa brojevima koji su identični brojevima na dresu igrača, navedeno se odnosi i na igrača koji u igri mijenja golmana.

DELEGAT UTAKMICE:

Član 21.

Za svaku prvenstvenu utakmicu komesar/povjerenik takmičenja/natjecanja određuje delegata koji zastupa NS FBiH i ima vrhovni nadzor na utakmici. Delegat je dužan doći u dvoranu 60 minuta prije vremena određenog za početak utakmice.

Delegat dužan je putem igračkih legitimacija ili na drugi način utvrđen Pravilnikom o nogometnim takmičenjima obaviti pojedinačnu identifikaciju svih igrača prijavljenih za utakmicu.

Delegat utakmice Prve futsal lige zapisnik i izvještaj sa utakmice dostavlja kroz COMET informacijski sistem a ostalo prema posebnom uputstvu takmičarskog organa.

Delegat na utakmici je obavezan u roku od 24 sata po odigranoj utakmici kroz COMET informacijski sistem zaključiti delegatski izvještaj.

Sudac izvještaj piše u COMET informacijskom sistemu. Sudac je obavezan sa delegatom utakmice sačiniti zapisnik, te provjeriti vjerodostojnost unosa podataka u COMET informacijskom sistemu.

Na prvenstvenim i Kup utakmicama delegatsku dužnost obavljat će delegati sa futsal liste delegata NS FBiH i NS/FS BiH.

Član 22.

Delegat je obavezan izvršiti i druge radnje koje mu povjeri komesar/povjerenik za takmičenje/natjecanje. Delegat koji se u svezi sa obnašanjem svoje dužnosti nedovoljno zalaže, odnosno ne provodi zaključke, odluke ili koji pokaže nedovoljno poznavanje Pravila igre za mali nogomet, bit će izostavljen u jednom ili u više delegiranja.

Ukoliko na utakmici dođe do incidenta, prekida utakmice, isključenja igrača delegat je obavezan u roku 24 sata dostaviti dopunsko izvješće, a na zahtjev Komisije ili Sekretarijata i u drugim situacijama. Na poziv Sekretarijata ili takmičarskog organa, delegat je dužan izvještaj ili dopunski izvještaj dostaviti i ranije.

NOGOMETNI SUCI:

Član 22.

Za sve prvenstvene utakmice, suce određuje Komisija za suđenje NS FBiH. Suci su dužni doći u dvoranu 60 minuta prije vremena predviđenog za početak utakmice, pregledati teren u smislu Pravila igre za mali nogomet i ustanoviti njegovu sposobnost za igru. Ako suci ustanove da je dvorana neosposobljena za igru i da se utakmica ne može igrati, dužni su svoju odluku priopćiti delegatu utakmice koji će o tome obavijestiti komesara/povjerenika za takmičenje/natjecanje.

Član 23.

Prvenstvene i Kup utakmice Prve futsal lige FBiH „Jug“ i „Sjever“ sude nogometni suci sa Futsal liste sudaca NS FBiH i NS/FS BiH.

Za Prvu ligu suci će biti delegirani iz susjednog kantona/županije ili prvog sljedećeg najbližeg kantona/županije, vodeći računa o udaljenosti od mjesta odigravanja utakmice. Za utakmicu klubova iz istog kantona/županije mogu biti delegirani suci iz istog kantona, a u slučaju ukazane potrebe iznimno i za druge utakmice.

Ako sudac koji je određen za suđenje utakmice ne dođe u određeno vrijeme za početak utakmice, utakmicu će suditi pomoćni sudac. Ukoliko na utakmicu ne dođe niti pomoćni sudac klubovi će se pismeno sporazumjeti da utakmicu sudi jedan od nazočnih sudaca saveznog ranga.

U slučaju da klubovi ne postignu sporazum, delegat utakmice će odlučiti koji će od nazočnih sudaca suditi utakmicu, što sve treba zapisnički konstatirati. Ukoliko sudac otkáže nalog za suđenje, obavezan je u pismenoj formi o tome obavijestiti NS FBiH i obrazložiti razlog otkaza.

TRAJANJE IGRE I ZAMJENA IGRAČA

Član 24.

Utakmica klupskog takmičenja u malom nogometu traje 2x20 minuta, a tokom utakmice mogu se izvršiti više izmjena igrača, a u skladu sa pravilima igre malog nogometa.

Član 25.

Čedrdeset pet minuta prije vremena utvrđenog za početak utakmice, ovlašteni predstavnici klubova dostavljaju delegatu utakmice na uvid nogometne/fudbalske legitimacije/iskaznice igrača koji toga dana nastupaju, kao i akreditacije trenera, ljekara i fizioterapeuta. Delegat neće dozvoliti obavljanje dužnosti iz tehničkog prostora ukoliko trener, predstavnik kluba ili fizioterapeut nemaju validnu takmičarsku akreditaciju NS FBiH za takmičarsku 2016/2017 godinu

ZABRANA NASTUPA ZBOG SUSPENZIJE:

Član 26.

Suspendovani tim ne može nastupiti na javnoj utakmici sve dok traje suspenzija. Suspendovani igrači ne mogu nastupiti sve dok traje suspenzija.

Sve odigrane utakmice u vrijeme suspenzije izrečene radi neizvršavanja pravosnažnih odluka nadležnih organa ili neizvršenja nespornih obaveza nastalih iz natjecanja predviđenih ovim Propozicijama, registrirat će se 3:0 (par-forfe) u korist protivnika.

TAKSA NA ŽALBU:

Član 27.

Taksa na žalbe za klubove u prvom stepenu iznosi 400 KM, a u drugom stepenu 800 KM, a taksa za pojedinca iznosi 50% od takse za klubove. Žalba na odigranu utakmicu mora se putem telefaksa najaviti u roku od 24 sata po odigranoj utakmici, a obrazloženje žalbe i taksa trebaju se dostaviti Sekretarijatu za takmičenje/natjecanje u dva primjerka i to u roku od dva dana od dana odigravanja utakmice.

Ukoliko rok za ulaganje žalbe ističe u nedjelju ili državni praznik, rok za ulaganje žalbi prenosi se na naredni radni dan. Pri ocjeni pravovremenosti žalbe, uzima se u obzir datum na poštanskom žigu preporučene pisma ili telegrama, datum na telefax potvrdi o žalbi odaslanom telefaxom ili datum na novčanoj uplatnici. Žalba na prvostepenu odluku podnosi se Apelacionoj komisiji u roku od osam (8) dana od prijema odluke.

Nenajavljene, neblagovremene ili nedovoljno taksirane žalbe neće biti uzete u postupak, već će biti odbačene.

Član 28.

Ako na utakmicu nije uložena žalba, a ne postoje razlozi za registraciju utakmice po službenoj dužnosti 3:0 (par forfe), utakmica se registruje postignutim rezultatom. U slučaju da je na neku utakmicu uložena žalba, rok za registraciju utakmice produžava se do donošenja odluke o žalbi, odnosno do izvršenja te odluke. Jednom registrovana utakmica ne može biti poništena od strane komesara/povjerenika, ako je odluka postala pravosnažna ili je u drugom stepenu donijeta odluka koja je konačna, osim u postupku predviđenom Pravilnikom o nogometnom takmičenju/natjecanju NS/FS BiH.

DISCIPLINSKA NADLEŽNOST:

Član 29.

O Disciplinskim prekršajima koje naprave klubovi, sudije, treneri i ostali nogometni dužnosnici u ovom takmičenju/natjecanju odlučuje Disciplinska komisija NS FBiH, na osnovu odredaba Disciplinskog pravilnika NS/FS BiH i odluka IO NS FBiH, a žalbe na odluku prvostepenog organa podnose se nadležnom drugostepenom organu NS/FS BiH.

FINANCIJSKE ODREDBE:

Član 30.

Kotizaciju u iznosu 1.200 KM za Prve futsal lige FBiH „Jug“ i „Sjever“, kojom se finansira rad organa koji u procesu takmičenja/natjecanja razmatraju pitanja takmičenja/natjecanja i donose odluke u vezi sa takmičenjem/natjecanjem, kao i izvršavanje administrativno-tehničkih i drugih poslova, klubovi će uplaćivati na transakcijski račun NS FBiH.

Uplata kotizacije može se izvršiti u dva jednaka dijela, s tim što se prvi dio (600 KM) uplaćuje najkasnije petnaest (15) dana prije početka jesenjeg, a drugi dio najkasnije petnaest (15) dana prije početka proljetnog dijela prvenstva.

Klubovi koji u predviđenom roku ne izvrše uplatu kotizacije ne mogu početi takmičenje/natjecanje.

Godišnja pretplata za službeni glasnik iznosi 100 KM

Ukoliko klub odustane od takmičenja u toku takmičarske/natjecateljske sezone, obavezan je izvršiti uplatu kotizacije za takmičenje/natjecanje u cijelosti.

Član 31.

Službenim licima za utakmice Futsal lige Federacije BiH pripada sljedeća taksa:

- Delegatu utakmice Prve malonogometne lige FBiH..... 60 KM
- Sudiji utakmice Prve malonogometne lige FBiH..... 60 KM

Službena lica nemaju pravo na dnevnicu.

Ukoliko službena osoba na utakmicu putuje do 30 kilometara (u jednom pravcu) van mjesta boravka ima pravo na putne troškove u iznosu od 10 KM.

Ukoliko službena osoba na utakmicu putuje do 50 kilometara (u jednom pravcu) van mjesta boravka ima pravo na putne troškove u iznosu od 20 KM.

Ukoliko službena osoba na utakmicu putuje više od 50 kilometara (u jednom pravcu) van mjesta boravka ima pravo na putne troškove u iznosu od 30 KM.

Član 32.

Službena lica se isplaćuju po ispostavljenom nalogu odmah nakon utakmice. Ukoliko klub ne izvrši isplatu službenih lica po ispostavljenom nalogu, prema Disciplinskom pravilniku NS/FS BiH automatski je suspendovan i ne može igrati narednu utakmicu sve dok ne izvrši isplatu službenih lica.

Sve isplate vrše se odmah poslije odigravanja utakmice. Ukoliko klub ne isplati službena lica ili ih djelomično isplati, klubu se ostavlja dodatni rok od 24 sata da izmiri troškove, nakon čega nastupa suspenzija do izmirenja obaveza u cijelosti.

Klub je dužan dokaz o uplati (jedan primjerak naloga) putne troškove i takse za sva službena lica dostaviti delegatu na brifingu prije početka prve naredne utakmice.

Klub neće moći odigrati narednu utakmicu ukoliko delegatu naredne utakmice ne dokaže da je finansijska obaveza (taksa i putni trošak) izmirena.

Član 33.

Novčana kazna za crveni karton iznosi 50 KM, a za žuti 25 KM, sa rokom uplate prema odluci Disciplinske komisije NS FBiH.

UTVRĐIVANJE PLASMANA:

Član 34.

Plasman klubova utvrđuje se prema odredbama Pravilnika o nogometnim takmičenjima/natjecanjima Nogometnog/fudbalskog saveza BiH.

Prvak futsal lige Federacije BiH će se dobiti nakon odigravanja završnog dijela prvenstva u kojem učestvuju po jedna najbolja plasirana ekipe iz obje grupe.

Prvak Prve futsal lige FBiH dobit će se nakon doigravanja u kojem učestvuju prvoplasirani timovi grupe „Jug“ i grupe „Sjever“.

Doigravanje se igra po Kup sistemu (domaćin – gost) nakon izvršenog žrijeba.

Pobjednik u odigrane dvije utakmice je prvak Prve futsal lige Federacije BiH za takmičarsku sezonu i prelazi u viši rang- Premijer futsal ligu BiH.

U slučaju prijave novih klubova za takmičenje u Futsal ligi Federacije BiH za takmičarsku sezonu 2017/2018, moguće je formiranje Prve i Druge futsal lige Federacije BiH. Pri formiranju takmičenja prednost će imati bolje rangirani timovi iz takmičarske sezone 2016/2017. Konačnu odluku o načinu futsal takmičenja u Federaciji BiH za takmičarsku sezonu 2017/2018 donijet će Izvršni odbor NS FBiH.

PRIJELAZNE I ZAVRŠNE ODREDBE:

Član 35.

Za sve što nije predviđeno ovim Propozicijama vrijede odredbe Pravila igre za "Futsal" (mali nogomet), Odluke Međunarodnog borda, Pravilnika o nogometnim takmičenjima/natjecanjima NS/FS BiH, te ostalih propisa i odluka NS/FS BiH, NS FBiH i njenih tijela.

Član 36

Ove propozicije stupaju na snagu danom usvajanja, a objavljuju se u Službenom glasniku Nogometnog saveza Federacije BiH.

PREDSJEDNIK
Mato Jozić vr.